

АНГИЙН ХЭЭРИЙН БАЙРЛАЛЫГ ЗОХИОН БАЙГУУЛАХ ЖУРАМ

1. Ангийн хээрийн байрлалыг зохион байгуулах газрыг хээрийн байрлалын ахлаач /ангийн захирагч/ нутгийн захиргааны байгууллагатай тохиролцож тогтооно.

2. Хээрийн байрлалыг хөндлөн, тууш шугамаар дөрвөлжин хуваана. Эдгээр шугам нь явганаар зорчих зам болно.

3. Хээрийн байрлалыг зэрэгцээ 3 шугамаар урд, дунд, арын зурвас болгон хуваана. Шугамуудын хоорондын зайг гэр, асар, майхан, барилга байгууламжийг байрлуулах шаардлагыг харгалзан тогтооно.

4. Хээрийн байрлалыг урд шугамаас арын шугам хүртэлх эгц шулуун тууш шугамаар хуваана. Тууш шугам нь ангийн батальон, /дивизион/, рот /батареи/-уудыг хооронд нь зааглана.

5. Нэгдүгээр /урд болон дунд шугамын хоорондох/ зурваст салбарууд дугаарынхаа дарааллаар байрлана. Гэр, асар майхнуудын хоорондын завсар 3 метр, зай нь 5 метр байна.

Хоёр дахь /дунд болон арын шугамын хоорондох/ зурваст ангийн штаб, хээрийн эмнэлэг, гал тогоо байрлана.

Гурав дахь /арын шугам болон ар талын замын хоорондох/ зурваст агуулах, засварын газар болон аж ахуйн бусад байгууламжийг байрлуулна. Хээрийн байрлалаас 75 метрээс ойргүй зайд бие засах газар, хог хаягдлын цэгийг төхөөрөмжилнө.

Галт хэрэглэл, тэсрэх бодисын агуулахыг хээрийн байрлалаас аюулгүй зайд байнгын хяналтад байхаар байрлуулна.

6. Хээрийн байрлалд ангийн удирдлагын ажиллах нөхцөлийг хангах зорилгоор тусгайлсан байрыг төхөөрөмжилнө.

7. Соёл амралтын танхимын асрыг рот /батареи/-ын арын эгнээний асар, майхнуудын төвд байрлуулна.

8. Хоёрдугаар эгнээний төвд Байлдааны тугийг тусгай байранд байрлуулна. Ангийн жижүүр, түүний туслагчийн майхныг тугийн байрны дэргэд байгуулна. Харуулын майхныг хоёрдугаар зурваст байрлуулна.

9. Нэгдүгээр зурваст байрласан рот /батареи/-ын майхнуудын ар талд зэвсэг хадгалах байр /майхан/-ыг төхөөрөмжилнө.

10. Ээлжтэний сүүдрэвчийг салбар бүрийн баруун, зүүн жигүүрт урд шугамд тус бүр нэгийг байгуулна. Байрлалын тохиромжтой газар усны сав, угаагуурыг байрлуулна.

11. Тавиуланг баруун, зүүн жигүүрийн аль тохиромжтой хэсэгт салхины чиглэлийг харгалзан байгуулна. Тавиулан байгуулах газрыг ангийн захирагч тогтооно.

12. Биеийн тамирын талбайг аль тохиромжтой газарт байгуулна.

13. Хээрийн байрлалыг газар орны байдалд зохицуулан дээрхээс өөрөөр зохион байгуулж, салбаруудын хоорондын зайг өөрчилж болно.